

欽定剿平三省邪匪方略

欽定剿平三省邪匪方略正編卷一百三十三

己未年

十一月十一日

乙丑

上諭內閣曰前此教匪滋事起於鄖陽一帶卽現在節次賊匪往來奔竄亦多由該府屬之竹山竹谿等處行走蓋緣該處爲陝西四川河南三省交界之所道路分歧山嶺險峻最易藏奸前明曾設鄖陽撫治卽本朝經理苗疆時湖南地方亦曾設有

偏沅巡撫此時鄖陽地方雖不必另增巡撫但僅
有知府等官在彼駐劄恐不足以示彈壓自應在
鄖陽添駐文武大員用資控制或增設鎮道或卽
於本省酌量移駐著軍機大臣會同大學士六部
尙書悉心妥議具奏

十五日

已

倭什布奏言竊

臣

前經確勘二竹地

勢抽撤兵勇擇要布置旬日以來各邊隘極爲

寧謐嗣駐紮竹溪河相距各要隘遠近不等誠
恐將弁兵勇日久懈弛因於十月二十六日復
自竹溪河迤西親往關垵仙女巖等處繞出大
花園西面河西溝豐溪仍迤南至大禾田陰條
嶺各卡挨次勘視均能堅壁深濠一律嚴整軍
火亦多爲預備仍激勸兵勇作其銳氣居常則
勤加操練聞警則互相策應並隨時盤詰以防

賊人偵探亦不得擾累平民臣周歷所至防堵

頗爲周密至村市及邊境民居俱皆陸續還集

修葺房舍亦漸復舊觀傳詢民人據稱此次賊

匪經官兵追剿緊迫旋即出境無暇搜括所以

糧食尙不見缺臣卽告以李淑高均德張漢潮

等各首逆皆被殲擒該民人等同深快慰現據

差探大寧之石壁山一帶有不知姓名一股賊

匪在彼遊奕人數無幾相去西溝卡隘二百餘里臣已飛飭沿邊各將弁加緊防範一有竄近的信臣卽就近親督所帶官兵前往迎堵斷不任其闖入奏入

上命軍機大臣傳諭倭什布曰此次倭什布親歷各卡遍爲查看兵勇等皆能防堵周密是楚境沿邊各要隘已經寧謐何以又稱差探大寧石壁山一

帶有不知姓名一股賊匪在彼游奕看來該督所稱防堵嚴密之語尙非實在情形故於摺尾畧露端倪將來若川匪闖入又可以此藉口該督節次奏摺俱按照遞到月日逐一抄存倘僅以防堵虛言爲目前搪塞之計仍任賊匪乘間竄至楚境不特疎防之咎無可寬貸並當治以欺飾之罪該督從前虛報李淑等股人數衆多歸州被賊焚燬官

舍民房隱匿不奏及遲悞軍營糧餉等事本有應得之罪經朕格外施恩仍留世職倘此次奏報又有不實任聽川賊闖入楚境必將前此應得罪名一併舉發將伊革職治罪豈但追回世職乎此時川東川北帶兵大員正在剿捕緊急之際賊匪不能在川停留必思向楚省逃竄倭什布惟當防禦嚴密遏其去路則川省官兵緊躡前來更可收兩

面夾攻之益無難將賊匪殲淨盡將來大功告竣帶兵各員及在本境實力防守者俱當一律嘉獎倭什布不特前愆可贖且得仰受恩施該督不可不倍加奮勉以實奏報毋得絲毫粉飾

十八日

壬申

上命軍機大臣傳諭那彥成松筠台布曰有人條陳陝省軍營運糧剿賊事宜四款其中如扼險設伏

剿除竄入江北餘匪及嚴守興漢通川各要隘以
遏賊匪逸入之路二條所稱山川道里擇要堵截
之處於陝省地勢尙爲熟悉似可採用其運糧招
撫二條所言南山大寨此時久已無存恐各州縣
無從修葺爲存貯糧石之所至官兵追殺之後卽
於打仗處所豎立招撫旗幟以便從賊中逃出者
就近投誠亦恐賊匪假裝被裹難民混跡其中一

時莫辨轉致墮其奸計於事未必有益著將此四條發交那彥成等閱看或可備採擇或事屬難行公同酌核具奏可也

同日

上命軍機大臣傳諭額勒登保那彥成德楞泰松筠曰此次教匪滋事皆係內地亂民非若從前之新疆回部及金川緬甸安南廓爾喀等處或係邊外

大部落或係外藩與國其領兵之人亦係彼處大
頭目臨時打仗時卽互有殺傷尙屬行軍常事今
此等教匪不過么膺草竊之徒凡茲鄉勇皆係良
民因與莠民打仗致有傷亡已覺可憫卽綠營兵
丁亦係良民充伍豈可任其傷殺若我八旗及盛
京吉林黑龍江兵自乃祖乃父以來最爲勁旅倘
因失利致爲奸民所戕尤爲可惜何況帶兵官員

爲國宣力致被戕害甚至如惠倫安祿皆屬五等
之封亦因剿此奸民歿於行陣更爲萬分不值朕
每思及此五內含悲且惠倫安祿二人伊父奎林
海蘭察均係宿將著有威名今伊二人以輕進捐
軀不但深堪軫惜言之卽爲墮淚並恐教匪等因
此啟其輕視之心甚至流傳外藩以名將之子不
能殲此匪徒而轉爲所害損傷威重尤有關係推

原其故總由滿洲及東三省官兵素性趨健勇於
忘敵而統兵大臣又調度不善往往零用派撥接
入綠營隊中以致力分見單卽勁兵無所施其勇
而轉致有輕身陷陣之事實爲三年以來軍營通
病著額勒登保及各路帶兵大臣嗣後派兵剿賊
總應將滿洲及東三省官兵自爲一隊毋得零星
派撥與綠營兵丁攙雜並進使我精兵勁旅蓄養

銳氣於應行奮擊時令其併力直前及鋒而用則
弓馬馳驟皆其所長以之剿此烏合亂民自必所
向披靡何難一鼓集事各路帶兵大臣皆當一體
遵照善用所長以收搏擊之效再前此軍營凡遇
打仗時雖據奏報每次俱有斬獲但其所殲斃者
不過被賊迫脅難民濫報邀功其實正賊何嘗能
大加殲戮卽云驗報首級而難民與正賊亦復何

所區別與其玉石無分徒殘良善孰若於臨陣時
廣爲曉諭使之棄械來投相率就撫既可散其黨
與亦不至枉戮難民節經降旨至爲明切該大臣
等總未見妥爲辦理以致賊匪仍前聚而不散何
由尅期歲事耶此時各股賊匪屢經官兵逼剿勢
已潰敗正當乘其窮窳將著名緊要賊首以次殲
除於年內將大局辦定乃額勒登保自本月初十

日奏到德楞泰自初七日奏到那彥成自初五日
奏到後均未據續有奏報而松筠審辦明亮永保
等之案亦閱旬日未經奏到陝省情形尤覺疲玩
豈竟以朕未經催促仍復彼此因循不思上緊辦
理必欲激朕之怒又爲永保之續耶

臣
等謹案聖王神武不殺當行軍誅叛之時
必先整齊步伐申嚴紀律惟恐疆場鋒鏑之

間多有殘殺自剿捕教匪以來

恩綸疊降

憫念戎行如傷之隱溢於尺一茲復以兵勇等陷陣
被戕實爲可憫而入旗勁旅勇敢風著甚至
宿將之子勛貴之臣均不免有輕進捐軀之
事

聖慈軫念至於言之墮淚

特申誠帶兵大員善用所長慎重派撥又惟恐玉石
不分

諭令臨陣曉諭俾之棄械來投方不致枉戮難民

仁心

仁聞雖頑梗亦應感格何況三軍之士有不奮與敵
愾者乎

十九日

癸酉

那彥成台布奏言竊

臣

等帶兵策應

行至金水河地方探聞賊匪竄至大建溝經恒
瑞截剿折回在秦嶺老林中奔竄當卽由三河
口向東北一帶前進督催各路兵勇探蹤追截
總未與賊以暇嗣竄出大建溝之賊經鄉勇首
千總銜楊太和等在核桃壩乘夜進攻殺賊十
三名其板房子竄出之賊經富成於廂溝追殺
三十餘名擒獲二名楊太和復於磨子岷與洋

縣鎗手合擊斃賊三十五名擒獲三名是日都
司劉滿貴帶領鄉勇楊蘭杰雷清等又於松垵
子殺賊三十三名擒賊四名綸布春於藥壩茨
溝遇賊奮力進攻追殺二十餘里殺賊一百餘
名擒獲三十餘名匪衆奔竄擦耳崖鄉勇楊太
和楊正元等又在該處迎截殺死執白旗賊目
一名賊匪六名副將多爾濟扎普叅將游棟雲

帶兵至麻坊子堽口賊匪自堽口擁出官兵趕

下溪邊殺賊十餘名又趕上右手山梁殺賊二

十餘名擒獲九名總兵長春侍衛愛星阿帶兵

至韭菜坪賊匪望風奔潰長春等趕緊追擊殺

賊十餘名奪獲白旗一面計旬日以來八次打

仗殺賊地方皆近老林爲官兵從未到過之地

所殺賊匪悉係呈驗耳級並無虛捏臣等自帶

領明亮兵丁後整齊兵力將領等頗知振奮不
敢仍前怠玩卽鄉勇探役人等經_臣等鼓勵路

遇零星賊匪日有斬獲敲獻軍營至於各路要

隘如田峪黑水峪五郎江口火地兩河口留壩

江口華陽等處皆派兵勇堵截嚴密惟賊中現

有冉學勝高遇春等爲首堅約死黨固結不解

總倚秦嶺一帶老林爲窟宅一見官兵卽行避

入每次打仗殺賊無多尙不能痛加殲戮目擊
情形萬分焦急現已減留馬隊嚴飭將領等步
行入林追剿務須兵隨賊到窮其所往不得稍
避艱險臣等亦卽親入老林督率進剿仍一面
隨時設法解散黨與務期速行蕝事所有明亮
前奏獲張漢潮李潮在事出力將弁謹查明

開單恭呈

御覽

那彥成又奏言查終南山北面一帶東西橫亘
入百餘里皆係老林合抱大樹密無空隙叢樹
之下遍生刺竹阻碍逼窄鎗箭難施且山上地
極高寒積雪凝冰處處陡滑兼有偏巖絕壁路
徑不通之處賊匪向來依山奔竄一經官兵剿
敗卽刻遁入以爲藏身之固剿捕耽延實因於

此然從前堵截不力每閱兩三月始能遇賊打仗一次賊匪尙係暫時竄入爲疲我兵力之計官兵一過得暇卽出仍由道路行走且因張漢潮老病乘坐竹兜險峻之處亦難立時飛越今該逆已殲賊中少一累重之人並不經由山溝路徑遇有極陡處所攀援徑上行走更爲捷速又見近日各路官兵遇賊卽擊畏懼不敢出山

總在老林內來往盤旋莫延殘喘目下山內地
方自五郎東至孝義鎮安經臣勸諭築堡團練

野無餘糧民有鬥志賊已不敢窺伺惟五郎迤

西堡寨尙未修築貧民傍山散處無地保聚且

有攜帶糧食入老林避難者今賊衆盤踞林中

隨地掠取並未斷絕口糧而兵勇等逐處窮追

亦祇制其竄出之路不能痛殲醜類臣五中焦

灼憤不欲生因思賊竄之地縱極艱險賊可至
兵亦可至似此與賊相持何日方能殲盡必須
親身入林督率衆兵方不至互相觀望昨已募
壯健兵勇懸賞鼓勵令赴老林山內務躡賊蹤
並嚴飭各路將領舍騎步行分投入林剿賊

臣

亦於漁洞子一帶輕減鍋帳等項從深林密箐
中直趨秦嶺卽或道路僻遠糧運不繼

臣

等及

衆官兵均可尋覓包穀通融接濟如此激勵奮
率與士卒誓同甘苦則兵氣感奮自不至稽延

時日臣係特蒙

知遇之人不敢存畏難苟安之見而實在難辦情形

並未於將領兵丁前宣露一字臣亦斷不肯因

此一奏預留延緩地步再臣督兵剿賊於應支

鹽菜口糧分例外一切日用不無需費之處查

臣
那彥成每年應支尙書俸銀三百六十兩都
統養廉六百兩仰懇

聖恩賞借五年俸廉共銀四千八百兩就近支領再
行按年扣還又查軍營兵丁從征日久多有疲
乏惟富成所帶兵丁一千五百餘名除凍餒患
病外實止一千一百餘名茲來臣軍營被褐無
裨實爲可憫當卽親加撫慰賞資並與台布商

酌一面飛催軍裝一面於臣等軍營勻給帳房
衣履支發口糧衆官兵一經鼓勵感激涕零咸
有更生之慶卽日告請入山追剿言詞俱出至

誠臣已令富成帶領荆州滿兵赴留壩江口防

堵卽將此項兵丁交岱森保富蘭管帶看此奮
勇真切情形疲兵亦可轉爲勁旅剿賊必能得

力

台布又奏言

臣

幫辦軍務凡軍營出力兵丁以

及各處搜山防卡義勇人等均須隨時犒賞若
先向糧臺提借事後再行歸還恐啓弊混之漸
查養廉原爲辦公而設合無仰懇

聖恩俯准於藩庫預支巡撫養廉二年以備應用仍
分作四年扣還歸欵庶軍營犒賞有資而糧臺
公項臣既絲毫不染亦可嚴行查察杜絕弊端

均奏入

上命軍機大臣傳諭那彥成台布曰那彥成等自前
月二十一日以後至本月初間連日遇賊卽擊不
予以暇於大建溝板房子等處督率兵勇跟蹤追
截俱有斬獲而綸布春於藥壩茨溝遇賊奮剿殲
斃一百餘名殺賊較多鄉勇楊太和殺賊奮勉所
奏自係實在情形不似從前軍營虛報惡習據稱

殺賊地方皆係老林爲官兵從未到過之地可見
從前帶兵大員等奏報不實至現在張漢潮餘匪
又有冉學勝高遇春等爲首堅約死黨以老林爲
窟宅賊匪等自因張漢潮殲斃後勢窮力蹙度無
生理是以糾夥竄入老林爲因獸猶鬪之計那彥
成現飭將領步行入林追剿並親入老林督率進
擊據陳一切情形有憤不欲生之語實爲過當現

在竄匪不過張漢潮餘黨並非首犯固不值與之
親身決戰卽係著名首逆如張漢潮亦不值爲此
語那彥成係軍機大臣經朕派往督師豈僅責以
衝鋒陷陣之事賊匪旣竄入老林卽當設法鼓勵
兵勇或選派能事將弁入山將賊匪轟出或放火
焚燒俾賊不能逃匿那彥成督率精銳官兵俟賊
匪出林或用鎗礮或用弓箭痛加剿殺方爲正辦

不獨那彥成不應冒險深入卽領兵大員如綸布
春等亦不應令其輕陟險地今那彥成旣親入老
林則台布同係帶兵之人勢難落後自必同時深
入試思伊二人俱冒險輕進設有疎虞於大局關
係甚重卽如木蘭行圍逐虎亦必須設法將虎引
出密林方可給擊斷無徒步入林與虎爭角之理
且老林內路徑險窄卽一二巴圖魯親自搏戰亦

不能得力何況那彥成台布等均係文員卽涉險
深入有何益乎那彥成此奏誠匹夫之勇太不知
輕重矣且據稱敵將領俱舍騎步行分投入林
盛京吉林勁旅馬上馳騁是其所長若不令乘馬
焉能得力閱之甚不放心並據稱於深林密箐中
直趨秦嶺卽糧運不繼均可尋覓包穀通融接濟
似此情形竟不忍看矣那彥成固當奮勇剿賊然

亦當萬分斟酌切不可過於橫激轉致胥無把握
至請借支尙書都統廉俸五年共四千八百兩那
彥成現在督兵剿賊自不無需費之處所有應得
尙書都統廉俸伊家中寡母妻子資以養贍竟無
庸借支著加恩另行賞給那彥成銀六千兩爲賞
兵等項之用可於陝西藩庫照數支領不必入軍
需項下開銷至台布所請預支養廉二年之處著

照所請行又據奏富成原帶兵一千一百餘名皆
被褐無禪閱之不忍注目那彥成現已親加撫慰
賞賚自應如此辦理官兵等均係爲國敵愾之人
何可令其衣被藍縷一至於此那彥成旣目擊富
成官兵如此情形將來伊所帶之兵自必隨時體
卹勿令困乏現在所賞那彥成銀六千兩並白布
准支二年養廉正爲此等賞需之用現屆嚴冬著

賞那彥成貂皮馬褂一件台布綸布春鳥雲豹馬褂各一件以示挾纘推恩之意

上諭內閣曰那彥成台布查明前次殲獲張漢潮李潮在事出力人員開單具奏乾清門侍衛桑吉斯塔爾最爲出力又能鼓勵將士著加恩賞給副都統銜仍舊乾清門行走其尋獲張漢潮屍身之遊擊胡定泰著以叅將陞用千總李國杰著賞給藍

翎又擒獲李潮首先搶上之兵丁張斌歐朝秀鮑
得俱著拔補外委並賞戴藍翎其餘打仗殺賊各
員內黑龍江佐領都爾圖著陞補額外總管防禦
齊克坦著陞補佐領雲南叅將傅雲陝西遊擊羅
全亮著賞戴花翎廣西守備王成傑著賞換花翎
黑龍江委官斌德勒圖等俱著賞戴藍翎

同日魁倫廣興奏言 臣 等檢查軍需案內有上

年七月間福寧陳奏德楞泰軍營每月需銀

萬兩奉

旨交福寧查核一案

臣

等飭調糧員覃光典前來達

州將隨營支放各項逐一分晰造冊呈報又於

上年十月間福寧陳奏明亮軍營所用夫騾過

冬奉

旨交勒保福寧嚴查一案亦經福寧飭令糧員田文

照將隨營支給夫騾各細賬分晰開報

臣

等查

覃光典自嘉慶三年五月二十一日委辦德楞

泰隨營糧務起至本年七月初五日交與通判

伍文森接辦之日止該員共領過軍需銀六十

五萬七千七百六十九兩零米三萬八千二百

三斗零閱時既久爲數甚多該員一手經理難

保無浮冒侵蝕情弊正在催辦間接據覃光典

後手承辦之糧員伍文森稟稱覃光典於前辦糧務時有積欠官兵鹽菜銀六萬餘兩糧米七千餘石今大兵不日回川勢必照數索補請飭覃光典仍赴軍營查算找給查隨營辦理糧務所有官兵例支鹽菜口糧應卽按名隨時給發何以有積欠銀米之事卽或從前轉運稍有不繼一經運到卽應立時補給清楚又何至積欠

銀數萬兩米數千石之多該員任意拖延顯有
侵蝕情弊當卽飭委局員立傳覃光典將經手
支放細賬勒限開明呈驗並將各官兵鈔墨各
領詳細核對一面飭委局員研訊據覃光典供
稱奉派隨營管理糧務以來所有官兵鹽糧草
乾等項每遇軍餉到營俱係隨時按領給發緣
節次解到軍餉不能寬裕本年夏間復有不繼

至七月初一日解到餉銀六萬兩當將各官弁
兵勇鹽菜馬乾夫騾等項均勻給發截至五月
初五日及二十二日止其自五月初五日起至
七月初五日交卸之日因續撥餉銀四萬兩尙
未到營是以共計積欠銀四萬七千五百餘兩
其口糧一項因吉林索倫巴圖魯分例較優餘
出米石不便裹帶均欲折價而本年五六兩月

內各官兵追賊深入老林道路崎嶇兵行無定
州縣所運軍米勢難及時趕到該官兵等自行
通融採買包穀等項以資日食囑俟餉到之時
折給米價以致積欠日期多寡不一按領確核
實共欠米四千六百二十一石零於七月初五
日交卸時會將積欠銀米細數移知伍文森明
其於續解軍餉到營卽照數分別補給至此題

積欠銀米數目與伍文森所稟不符之處想係
伍文森自七月初五日接辦起至七月二十六
日師行入楚之日止中間亦有積欠在內請飭
查覆核對並將經手收支銀糧數目開造清冊
及官兵鈐墨各領呈交到局經該局員逐一清
算核對臣光典面訊所供無異覆
核該員所閱各冊統計單光典經手支發過各

官弁兵勇鹽菜草乾夫驢腳價等項銀五十二萬五千八百六十一兩零又各官兵借支整裝等項銀一十三萬二千二百三十九兩零共支發過銀六十五萬八千一百一兩零除覃光典承領過餉銀外尙多用銀四百三十二兩零訊係覃光典自行借墊至積欠銀米數目與伍文森所稟多寡不符雖覃光典所供想係伍文森

七月初五日接辦以後復有積欠統計在內之
語但案查達州局撥發餉銀四萬兩解抵夔州
之時德楞泰一路官兵已全入楚境餉銀仍貯
夔州是覃光典所欠之銀四萬餘兩米四千餘
石伍文森未經收到餉項無由照數補給而伍
文森接辦時僅收覃光典移交兵餉銀二千兩
存備撫卹迨出難民銀二千兩計自七月初五

日起截至二十六日止伍文森承辦糧務已及
兩旬恐其間或有懸欠之項籠統併開在內亦
未可定除另飭伍文森令其查明據實稟覆外

臣

魁倫復親向覃光典詰訊軍營夫騾一項業

經勒保福寧於上年具奏部駁不准奉文停止
該員何得違例濫行支應且該員所辦一路軍
營所有官兵需用夫騾共計若干是否實夫實

騾供應抑係折價所折價值每騾銀若干每夫銀若干各官兵收支夫騾價值有無鈐領又夫騾折價之外有無別項供支令其詳悉登荅據供賊匪奔竄無常官兵分別追擊逐日移營並無停住定所每口行走百數十里不等遇賊卽行打仗而所行俱係深山密林軍裝糧石均須夫騾馱運所以雖係奉文停止而勢所必須之

處承辦糧員不敢拘泥成例致悞師行不但軍
光典一人各路糧員皆是如此辦理只求通行
查問此路官兵係奉德恭贊諭令吉林索倫滿
洲每兵十名給長騾二頭半每頭月給雇價銀
九兩每兵十名共月支騾價銀二十二兩五錢
綠營兵丁及屯土兵並鄉勇一項因騾價未經
奏准不便一律給發仍照長夫給價每兵十名

給長夫四名每夫一名月支銀三兩每兵十名
共月支夫價銀十二兩至將領員弁本身及跟
役應得馱折均係折算人夫每夫一名亦月支
夫價銀三兩以上所需夫騾俱係該官兵隨時
支領價值自行雇備並非糧臺雇給外有各營
隨帶礮位火藥需用夫騾併係該官兵自行雇
覓由糧臺折給價值均有鈐墨領狀爲據至德

叅贊暨阿副都統等共五人應得分例係按月
差弁前赴糧臺支取並無領狀此外亦並無別
項供支惟是上年五月內德叅贊由陝入川時
計帶兵八千餘名因賊匪奔竄無常各路官兵
分投剿辦有將此路官兵撥赴別路者亦有別
隊官兵撥入此路協剿者極多之時計有萬餘
少約七八千人單光典接辦十三個月有零爲

時已久各官兵時增時減其支領月日參差不齊勢難按月截扣是以現呈清冊內係將

盛京吉林索倫及各省官弁兵勇分別欸目開載另具總數清單呈核此德楞泰一路軍營之承辦糧員覃光典供支情形也又查田文煦係上年七月初九日委管明亮隨營糧務至十一月十三日止共領過軍餉銀五萬三千兩據該員

開造支用清摺內開自九月初二日至十月初
一日止計一個月共支過長夫二千二百餘名
馱騾一千三百餘頭匹每夫一名月支工價銀
三兩每騾一頭月支脚價十二兩及十兩八錢
不等共支發過銀一萬五千五百三兩零均有
鈐墨領字爲據臣魁倫查該員所開夫騾數目
與上年稟報福寧之數旣屬相符且自帶領索

倫馬隊之大臣愛星阿以下至各官弁兵丁均
有鈐墨領據是明亮等一路所帶官兵三千餘
名實有需用長騾一千餘頭長夫二千餘名之
事何以明亮於覆奏摺內稱面詢該員田文煦
有多開數目以便寬爲預備之語該員既不據
實回明轉肯自認多開數目稟報甘居捏冒重
咎殊不可解因傳田文煦親加詰問據田文煦

稱上年十一月十三日在陝省洋縣地方卽已
交卸糧務明叅贊奉

旨明白回奏係屬在後明叅贊並未詢過夫驛數目

及自稱有意多開之語臣等查田文煦所稱明

亮並未面詢之處雖屬一面之詞而明亮一路

軍營需用夫驛至一二千之多田文煦實有底

張可據顯係明亮違例任意多索轉於奉

旨明白回奏時該卸其咎於糧員飾詞自佔地步應
請

飭交那彥成松筠等就近詢問以上二案俱係上年
欽奉

諭旨交勒保福寧查辦之事緣覃光典田文煦二員
均有軍營差使在外本年秋間始先後調至達
州現將賬目開報呈驗臣等查長夫長驟二項

先經奉部議駁通行停止今據覃光典所開清冊該員管理德楞泰一路糧務計十三個月零卽已發過騾腳價銀二十二萬六千九百六十餘兩田文煦管理明亮一路糧務除鹽菜各項外計一個月支發夫騾腳價卽用銀一萬五千五百餘兩是帶兵之員與承辦糧員顯屬違例濫支濫應均應究辦且因此之故所有節次餉

銀解到軍營時領兵員弁以及糧務各員皆先行扣還墊借夫騾價值轉將正項兵餉懸欠於下次請領之時補給以致賬目糾纏不能卽時劃清確數臣等查訪各路皆然並不止覃光典田文煦二人現當剿賊喫緊之際又未便將各路糧員逐一調回清算應請仍俟大功告竣之日再行核實清算將違例給發之項著落於濫

支濫應各員名下分賠查明亮於上年帶兵由
陝入川復自川至陝往來道路當時糧餉有川
省糧員借用陝省銀兩者亦有陝省跟隨來川
供應糧務者田文煦係當時隨營經手之員所
開各冊尚有與陝省交涉未清之處臣等現飭
局員查明劃清月日款項並查明陝省一體分
晰查清開冊咨覆以憑確核辦理覃光典亦當

有積欠銀米數目不符一節應俟伍文森稟覆到日再行核辦

魁倫廣興又奏言查此次軍需用餉率多浮濫

臣等先後來川清釐究辦亟需劃清界限另定

章程不致稍有牽混臣魁倫自抵達州後查問

福寧並局員等各軍營每月實需用銀若干均

不過約畧其詞並無確數推原其故總以兵數

不清夫驟並無定價爲言福寧雖經會同勒保將支應各條兩次具奏嗣經部臣議駁不過將所駁原文通行各總理及糧員等遵照辦理不准仍前濫用而前敵之能否遵行未曾確切查核在伊以爲各營不能照辦自有濫支濫應各員承受其咎與已無干殊不知日久因循餉銀已經用去卽事後追賠徒滋延宕且各糧員並

臺站州縣請領銀兩因未知其實在需銀數目
見其領數稍多不得不量加核減往往請領一
萬酌發三五千不等而糧員等因其每月並無
定數明知該局不能如數給領任意多開以備
核減遂致日積月累糾纏難清此歷年辦理糧
餉未能切實清理之實情也臣等經手接辦自
應將可省者全數刪除必需者據實造報方能

各知底裏於每月用數均可按籍而稽絲毫無
從假借卽或有無定欸無定數之項隨時核其
實用數目立予發清各該員亦無從引爲口實
是以臣魁倫於接辦之始卽詳查檔案兵勇數
目旣牽混不清而夫驟雇價仍復多寡不一有
每夫日給銀八分者又有日給一錢者有每驟
月給銀九兩者又有月給十二兩者旣無準數

焉能一律劃清而體察情形實有不能悉照定
例辦理之勢因查額勒登保一路每兵百名係
給夫四十名照每名每日給銀八分計算夫們
每月給銀九十六兩雇騾雇夫聽兵自便本較
別路爲節省今旣另立規條似應以額勒登保
之言爲定準當卽令會額勒登保將各路軍營
官兵確數及應領鹽菜分例等項何者爲必需

何者爲可減囑其詳細查覆並嚴飭各路隨營糧員將雇用運送軍火礮位糧餉之夫騾計其一定數目不許稍有加增其各府州廳縣防守卡隘之兵勇均令據實報明聽候委員點驗各臺站應支運腳銀兩截至福寧交卸之日爲止縱有舊欠且俟查明再辦自_臣等接辦之日起察其繁簡緩急酌撥銀兩備用按十日一報一

有浮用卽立時駁斥仍按月結一總數以杜影

射侵欺之弊

臣

慶興於初一日行抵達州連日

與

臣

魁倫正在悉心籌議間茲於初四日接據

額勒登保覆稱現在通盤籌計實因此次軍需

非歷次可比從前勒保福寧條奏各款雖與例

案不符實則已從節省迨經兩次部駁照文轉

行而各路軍營勢難遵衆卽如滿漢官兵駁折

等項仍照過站例全支滿兵本有馬乾三匹亦
全數支給今擬均照減半給與雖不免過於拮
据亦不能顧及惟前因餉項不敷是以先儘兵
丁關支官員俱有積欠現擬官員以八月初一
日爲始滿兵以十月初一日爲始均減半給予
馱折馬乾其滿漢兵丁除跟役餘丁外每百名
均給長夫四十名幫同背運鑪帳等項實已無

可再減並開具額勒登保軍營及七十五朱射
斗阿哈保等各官弁兵勇總數共有二萬六百
餘員各核定支領銀數每月約需銀五萬二千
八百餘兩其各處防守官兵及糧員夫騾一切
在外囑令_臣等會商具奏_臣等伏思額勒登保
平日支用餉項於領兵各大臣之中最稱慎重
其所定官兵支領數目較之從前又節省十之

二三每兵百名給夫四十名雖較部定長夫二十名爲尙多而比勒保福寧所定長騾二十頭每頭九兩之數已省一半若與宜綿任內支給長騾四五十頭比較則更大相懸殊斷難再減若再事苛刻不特勢不能行必致仍前因循遷就是徒有駁餉之名轉無節省之實是以臣魁倫札致額勒登保暫行照辦請

旨定奪其各處防守兵勇及隨營糧員所雇夫騾均
已通飭清查不難得其實數各州縣臺站應領
運脚及成都達州保寧三局另有製辦軍裝軍
火等項銀兩現俱飭令逐一查開統俟一月以
後核總計算皆可眉目畢清不致牽混凡有應
改章程俱隨時會同確核辦理再 臣 魁倫現奉
諭旨以隨營馱運糧米雇用騾價浮多係屬例外之

事不准所請臣等具有天良寧敢任屬員從中
冒濫惟其中有不得不用者若因格於成例而
不辦勢必貽誤軍行或以違例之事恐于

聖明指斥仍事顛預不奏將來必至於報銷時將無
作有以假亂真多方設法捏款造報亦非核實
辦公之道况從前軍需積習大率皆悞於事竣
籌銷一語以致百弊叢生今臣等現須另立章

程亦當徹底釐剔按照實數奏報斷不敢稍涉
欺朦轉啓屬員滋弊之漸卽如臣魁倫同春寧

等前過陝西時因恐棧道馬匹不敷取用騎馱

由西安省局辦給長騾每站發銀六錢臣廣興

此次押餉赴川經過陝西亦係每騾每站發銀

六錢按一月計算應給雇價一十八兩此皆臣

等身親目擊聞陝省卽係通融辦理亦不過於

事後籌款造銷昨派道員劉濤赴東鄉太平一路催趨糧運添安臺站該員因恐夫騾一時不能就地多雇卽由達州雇騾三百頭帶往其雇價實係每月十二兩劉清因知臣魁倫已將川

北道李鉉所雇騾價駁減伊祇稱每頭九兩不敷之項聞係該道自賠刻下太平東鄉開縣等處卽有被賊搶失糧石夫騾之案四起共失米

四百六十餘石運夫腳戶多有被戕者臣等一

面查明賞卹一面飭令站員將失米運腳一概

照數着賠而騾夫因屢經遇賊搶騾戕命每冬

裹足不前不得加價雇用且軍需例載陸路

運送軍糧腳價雇覓馬騾馱運無論口內口外

每石每百里給銀三錢本有專條今隨營馱運

軍糧每日必須與兵同到日行百里及百數十

里正與定例相符前此部臣所引雇馬每匹每日給銀一錢五分之例係照金川雇用民馬成案駁斥但金川軍需所雇民夫民馬係各州縣派出夫馬赴營當差今所雇騾頭並非派自州縣若祇給銀一錢五分實在不敷當此功屆垂成全在士馬飽騰以冀剋期滅賊必須源源接濟兵糧自不得不用長騾跟運若再加駁減必

致各驛員仍前捏報是除弊而適以滋弊應仰
懇

天恩俯准照每站三錢之例定以每驛月給雇價銀
九兩其糧運不致貽誤實於軍務有裨至節省
軍需必須去裁浮冗所有各路老病疲乏之兵
先經勅保飭傳齊至達州查驗調養臣魁倫到
任後隨時稽察除已愈者均令各歸前敵外其

殘廢不得力者俱經陸續分起遣回原共有八
百二十五員名現在達州尙有留養兵一千三
百五十六名卽由臣魁倫就近再行挑驗遣回
其各路軍營已咨會額勒登保通飭查辦分別
去留以期兵歸實用餉不虛糜再各兵借銀三
兩以資趕辦衣服從前額勒登保所定綠營兵
則咨回坐扣吉林索倫滿兵則於鹽菜內扣還

原以滿兵所得分例較綠營稍多是以如此辦理今滿兵馬乾既減半支給並裁撤長驛均照綠營兵一律給予長夫數目不便再有兩歧亦已咨會額勒登保一體飭知該處將領等照例坐扣並飭令糧員不必於鹽菜內扣還臣等和衷商權實力稽查俾軍需用款事事均歸核實仍復酌籌緩急妥爲接濟斷不敢稍有欺飾浮

濫再臣等前奉

諭旨令廣興將所奏解送省局五十萬兩爲採買倉

穀之用與魁倫熟商妥辦臣魁倫以此項採買

穀一百萬石需銀五十九萬兩卽爲豫備碾供

軍營兵米之用甚關緊要且據藩司稟稱先已

採買交倉專候餉銀接濟若此時稍有短少未

免失信於民况省局並有製造軍火帳房弓箭

刀械等項備撥應用如僅撥銀五十萬兩實屬

不敷支發所有解到京餉仍當以九十萬兩撥

解省局十萬兩撥解達州臣廣興當卽札致押

解後起餉銀之托津照數分別撥解臣魁倫一

面飛飭藩司林僈令將省局軍需項下應用款

目若干逐一分晰開具清摺使軍務與地方經

費兩項截然不相攙雜以杜混淆冒銷之弊臣

廣興於抵達州後連日與臣魁倫悉心籌酌惟

有將此項餉銀先儘從征官兵之用俾士馬飽

騰膚功迅奏斷不令屬員朦混開銷奏入

上命軍機大臣傳諭魁倫廣興曰川省軍需自魁倫

等接辦之後察其繁簡緩急酌發銀兩十日一報

月結一總從此影射侵欺之弊可以杜絕至額勒

登保操守廉潔平曰支用餉項最爲慎重其所定

官兵支領數目如每兵二日名給夫四十名雖較部
定長夫爲數稍多而較之勒保福寧所定長騾脚
價已省一半與宜綿任內支給則大相懸殊此皆
宜綿辦理不善以致多有糜費今魁倫等與額勒
登保酌定數目以後各軍營俱當照額勒登保一
路官弁兵勇所領銀數支給以歸畫一至川省各
股賊匪往來無定官兵逐日追擊馱運軍糧每日

必當與兵同到據魁倫等所奏務須雇用長騾並
據酌定每騾月給雇價銀九兩自係核實辦理此
事若仍交部議必按例議駁但該處情形既不得
不用長騾馱運魁倫等自可一面雇用將來報銷
時卽部臣指駁另當降旨准行此時剿賊喫緊不
可稍惜小費若能將賊匪剋日蕩平則所省實多
倘支用缺乏以致軍行不能迅速賊匪稽誅所費

糧餉更不可勝計魁倫等所稱全在士馬飽騰以冀逾期滅賊之語最爲得要嗣後凡有軍營萬不可少之項而與定例不符者該督等不妨核實具奏總之可省者全數刪除必須者據實造報斷不可稍有牽混也

上又命軍機大臣傳諭松筠曰魁倫廣興奏查明亮一路軍營需用夫騾至一二千之多現據田文煦

供稱明亮並未向伊面詢大騾數目而明亮前此
獲奏摺內稱會詢之田文蔚因日日移營寬爲預
備是以多開數目顯係明知飾詞諉卸著松筠卽
向明亮嚴切究訊確實毋得含混朕辦理庶獄卽
一介小民不肯稍有屈抑況軍營帶兵大員焉
有不將罪狀查核明確速行審結之理乃松筠審
辦明亮永保慶成等日久未定案並將奉旨擊

問罪名未定之虞成擅令帶領撒拉爾回兵及接
到飭諭又復撤回何茫無定見若此著再傳諭松
筠卽將明亮永保慶成等詳加質訊務得確情速
行審結伊等應得罪名松筠惟當核其情節按律
定擬至伊三人中有曾經帶兵出力著有勞績之
處朕豈有遺忘功罪權衡自有裁度松筠祇須就
案定罪不必心存揣測也

同日

上命軍機大臣傳諭額勒登保那彥成曰川陝剿辦
教匪前此帶兵大員等觀望遷延經朕大加整飭
將勒保明亮永保慶成先後革職拏問現在川陝
督師大員如額勒登保帶兵最爲奮勇那彥成並
欲親入老林搜剿賊匪是各路軍營現已力矯疲
玩積習銳意殺賊不肯稍有落後至從前辦理軍

需大員等浮冒之處甚多惟恐軍務完竣無可開銷難以掩飾濫支之罪今則肅寧宜綿景安俱已先後罷斥治罪現在總理軍儲者如魁倫廣興松筠均係現經更換可信之人諒無前項情事無所用其瞻顧而額勒登保那彥成等俱係受恩深重之人自必思迅速蔽功及早回京得膺懋賞焉有樂於在外被冒霜雪不上緊剿辦之理惟是賊匪

經官兵痛剿後已十分畏懼勢力窮蹙近日賊遇
官軍不敢接仗輒行逃竄入山並聞該處民人互
相屯守多有依山結寨將糧食悉行保護賊匪無
從掠食不過竄處窮林爲苟延殘喘之計此正如
困獸已入深林捕獸之人若冒險窮追轉恐猝不
及備或有踈虞今賊匪旣鋌而走險自不若平曠
處所官軍得以奮力剿殺而深林密箐中匪黨潛

匿不時偵伺若官軍入山追躡轉易墮賊奸計朕
思目下賊蹤所聚大率在陝之南川之北該處樹
林綿密路逕叢雜若帶兵大員等止於境內追擊
則賊匪路路可通難以攔截現在川省有經畧額
勒登保總統軍務陝省則係那彥成居首督師伊
二人雖分兩地實則同辦一事惟當無分畛域會
商合剿於川陝兩而將各股賊匪併力兜截一處

協力奮剿額勒登保不可以那彥成係屬欽差專
辦陝省軍務恐分其功惟知剿辦川賊那彥成亦
不可以額勒登保係屬經畧心存推讓止辦陝賊
不復籌及全局總須令川陝兩面官軍聲勢聯絡
彼此相通俾賊勢益蹙庶可收合力同心之效將
來大功完竣自必同沐酬庸之典也至各處民人
團集保聚最爲善策當飭令地方官曉諭居民以